

**BN menjanjikan BR1M meningkat sehingga RM1,200 dalam manifesto
Malaysian Insider
April 6, 2013
Oleh Mohd Farhan Darwis**

KUALA LUMPUR, 6 April — Barisan Nasional (BN) menjanjikan kadar Bantuan Rakyat 1 Malaysia (BR1M) untuk kumpulan berpendapatan rendah akan meningkat sehingga RM1,200 secara berperingkat bagi penerima berkeluarga dengan pendapatan bawah RM3,000 sekiranya gabungan pemerintah itu diberikan mandat dalam Pilihan Raya Umum ke-13 (PRU13).

Bagi kumpulan penerima BR1M bujang pula, BN menjanjikan penerimanya bakal menerima sehingga RM600 dalam tempoh lima tahun mereka memerintah.

Pengumuman itu dibuat Datuk Seri Najib Razak ketika mengumumkan manifesto "Menepati Janji Membawa Rakyat" di Stadium tertutup Bukit Jalil di hadapan 40,000 penyokong BN di sini.

BN sebelum ini telah melaksanakan pemberian BR1M 1.0 dan BR1M 2.0, yang mana BR1M 2.0 turut mensasarkan kumpulan belia bujang yang berpendapatan RM2,000 ke bawah, dan menelan belanja RM3 bilion bagi perbelanjaan tersebut.

Najib juga pernah mengumumkan akan melaksanakan BR1M 3.0 dan seterusnya sekiranya parti yang diterajuinya itu berjaya mendapat mandat rakyat dalam PRU 13.

Setakat ini, sejak pengenalan BR1M pada 2012, kerajaan BN telah memperuntukkan sejumlah RM6.4 bilion bagi menangani kos sara hidup rakyat, termasuk pengenalan RM250 Baucar Buku 1 Malaysia untuk pelajar institusi pengajian tinggi, dan RM 100 bantuan persekolahan untuk pelajar sekolah rendah dan menengah.

"BR1M bukan beli undi, ia ditujukan kepada mereka pendapatan rendah, bawah RM3,000.

"Kalau subsidi minyak kita beri kepada semua, orang kaya, pelancong semua turut menerima subsidi, tapi BR1M begitu fokus, kita tahu siapa layak siapa tak layak," kata Najib dalam ucapannya malam tadi.

Jelasnya lagi, kesemua pemberian "one-off" kerajaan BN itu adalah hasil perkembangan ekonomi negara yang kukuh sehingga dapat dokongsi semula bersama rakyat.

"Ini semua kita dapat lakukan kerana ekonomi berkembang termasuk hasil negara kita dan kalau kita bagi BR1M ekonomi tempatan jadi terangsang," katanya.

Bagi kos sara hidup di Sabah dan Sarawak, pentadbiran Najib telah membelanjakan RM586 juta dalam tempoh dua tahun untuk Skim Penyeragaman Harga supaya harga barangan keperluan di negeri Borneo itu selaras dengan Semenanjung Malaysia.

Sejumlah 85 Kedai Rakyat 1 Malaysia (KR1M) turut dibuka termasuk perbelanjaan RM134.8 bilion subsidi barangan keperluan harian seperti beras, tepung, gula, bahan api, dan sebagainya.

Janji BN juga turut merangkumi penurunan cukai kenderaan melalui semakan Dasar Automatif Nasional sebanyak 20 hingga 30 peratus secara berperingkat selain meningkatkan daya saing kereta nasional.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/bn-menjanjikan-br1m-meningkat-sehingga-rm1200-dalam-manifesto/>